

Na osnovu člana 117. Zakona o upravnom postupku ("Službene novine Federacije BiH", broj 2/98 i 48/99) i čl. 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo donijela je, na 15. sjednici održanoj 31. maja 2007. godine,

UREDBU

O NAKNADI TROŠKOVA UPRAVNOG POSTUPKA

Član 1. (Sadržaj Uredbe)

Ovom Uredbom uređuju se naknade troškova u upravnom postupku (u dalnjem tekstu: troškovi), način utvrđivanja i isplate, odnosno naknade troškova oslobadanja od plaćanja troškova, kao i naknada troškova službenog lica organa koji vodi upravni postupak, pred kantonalnim, općinskim i gradskim organima uprave u Kantonu Sarajevo (u dalnjem tekstu: organ koji vodi postupak).

Član 2. (Vrste i uvjeti naknade troškova)

- (1) Naknada troškova po odredbama člana 1. ove Uredbe obuhvata:
 - a) troškove svjedoka,
 - b) troškove vještaka i tumača,
 - c) putne troškove službenih lica organa koji vodi postupak.
- (2) Naknada troškova licima iz tač. a) i b) stava (1) ovog člana pripada pod uvjetima utvrđenim Zakonom o upravnom postupku i ovom Uredbom.
- (3) Troškovi vještaka i tumača iz tačke b) stava (1) ovog člana obračunavaju se i ostvaruju u skladu sa federalnim propisima kojima su utvrđena ta prava svjedoka i vještaka.

Član 3. (Princip jednakosti spolova)

Gramatička terminologija u ovoj Uredbi podrazumijeva uključivanje oba spola.

Član 4. (Naknada prijevoznih/putnih troškova)

Naknadu prijevoznih/putnih troškova svjedoka određuje organ koji vodi postupak, u skladu sa federalnim propisima kojim je ta naknada utvrđena za državne službenike i namještenike.

Član 5. (Naknada za ishranu i prenoćište)

Naknadu za ishranu i prenoćište svjedoka određuje organ koji vodi postupak, u skladu sa federalnim propisima kojim je ta naknada utvrđena za državne službenike i namještenike.

Član 6. (Naknada plaće, odnosno izgubljene dobiti)

- (1) Naknada plaće, zbog odazivanja na poziv u svojstvu svjedoka, pripada zaposlenim licima, a naknada za izgubljenu dobiti pripada obrtniku.

(2) Naknada iz prethodnog stava pripada zaposlenom licu i kad nije odsustvovalo s rada, ako radi u noćnoj smjeni, a dužnost svjedoka je izvršilo u vrijeme kad treba da se odmara i priprema za redovan rad u noćnoj smjeni.

Član 7.

(Način određivanja naknade plaće i izgubljene dobiti)

(1) Naknada plaće zaposlenom licu, za vrijeme odsustvovanja s rada po pozivu za svjedočenje, određuje se u skladu s propisima o radnim odnosima i plaćama.

(2) Naknadu za izgubljenu dobiti obrtniku, za vrijeme odsustvovanja s rada po pozivu za svjedočenje, određuje organ koji vodi postupak, polazeći od izgubljene dobiti koju bi obrtnik ostvario za vrijeme koje je proveo u svojstvu svjedoka.

Član 8.

(Naknada troškova za pratioca)

Ako je svjedoku, uslijed bolesti, tjelesnih mahana ili godina starosti, potreban pratilac, pripada mu naknada troškova i za pratioca po odredbama čl. 4. do 7. ove Uredbe.

Član 9.

(Troškovi prevodenja na jezike nacionalnih manjina)

Troškovi prevodenja na jezike nacionalnih manjina u Federaciji Bosne i Hercegovine, u skladu sa ustavnim obavezama zaštite manjina i zakonom kojim je utvrđeno pravo pripadnika nacionalnih manjina na upotrebu svog jezika, padaju na teret budžetskih sredstava organa koji vodi postupak.

Član 10.

(Putni troškovi službenih lica)

Naknada putnih troškova službenih lica organa koji vodi postupak određuju se u skladu sa federalnim propisima kojim je ta naknada utvrđena za državne službenike i namještenike.

Član 11.

(Isplata naknade troškova)

Naknadu troškova isplaćuje organ pred kojim se vodi postupak, na osnovu zahtjeva iz člana 15. ove uredbe.

Član 12.

(Isplata naknade plaće, odnosno izgubljene zarade)

Izuzetno od odredaba člana 11. ove Uredbe, naknadu plaće, odnosno izgubljene dobiti, isplaćuje organ koji vodi postupak, na osnovu zahtjeva za refundaciju koji je podnio državni organ, stručna ustanova ili drugo pravno lice kod kojeg je svjedok, vještak ili tumač zaposlen, odnosno zahtjeva obrtnika.

Član 13.

(Naknada troškova pred zamoljenim organom)

(1) Kada je svjedočenje, vještačenje, tumačenje ili uvidaj vršeno pred zamoljenim organom, o zahtjevu za naknadu troškova, odnosno za određivanje nagrade, odlučuje taj organ.

(2) Ako organ koji vodi postupak nije zamoljenom organu unaprijed dostavio potreban iznos za pokriće troškova, naknadu odnosno nagradu isplaćuje zamoljeni organ iz svojih sredstava, a organ koji vodi postupak je dužan da, na zahtjev organa koji je izvršio isplatu, nadoknadi isplaćeni iznos.

(3) Ako su pred zamoljenim organom svjedočenje, vještačenje ili tumačenje vršila lica u radnom odnosu, zamoljeni organ je dužan da, u potvrdi koja se izdaje takvom licu, naznači organ koji vodi postupak, sa upozorenjem da zahtjev za refundaciju naknade plaće treba uputiti tom organu.

Član 14.
(Isplata, odnosno naplata troškova unaprijed)

Svjedoci, vještaci i tumači mogu tražiti od organa koji vodi postupak po službenoj dužnosti da im se unaprijed isplati potreban iznos za putne troškove, a vještaci i za troškove vještačenja.

Član 15.
(Zahtjev za naknadu troškova)

(1) Naplata naknade troškova vrši se na osnovu zahtjeva za naknadu troškova koji podnose svjedoci, vještaci i tumači prilikom svjedočenja, vještačenja ili tumačenja, uz podnošenje, po potrebi, dokaza kojima se pravdaju učinjeni izdaci.

(2) Zaposlenim licima izdaje se, odmah po završenom svjedočenju, vještačenju ili tumačenju, potvrda o vremenu koje su proveli vršeći te dužnosti, s ciljem ostvarivanja prava iz člana 12. ove Uredbe.

Član 16.
(Način oslobođanja od plaćanja troškova)

Oslobađanja od plaćanja troškova vrši organ koji vodi postupak, na osnovu zahtjeva stranke, a u skladu sa Zakonom o upravnom postupku, zakonom kojim su regulisane administrativne takse i drugim propisima kojima su utvrđena oslobađanja od plaćanja troškova.

Član 17.
(Prestanak važenja dosadašnjeg propisa o naknadi troškova)

Stupanjem na snagu ove Uredbe prestaje da važi Uredba o naknadi troškova u sudskim postupcima ("Službene novine Kantona Sarajevo", broj 23/03 - Prečišćeni tekst i broj 9/04).

Član 18.
(Obračun troškova prema momentu njihovog nastanka)

Organ koji vodi postupak obračun troškova vrši prema visini troškova u momentu njihovog nastanka.

Član 19.
(Stupanje na snagu)

Ova Uredba stupa na snagu osmog dana od dana objavljivanja u "Službenim novinama Kantona Sarajevo".

Broj 02-05-15743-7/07
31. maja 2007. godine
Sarajevo

Premijer
Samir Silajdžić, s. r.